





内閣文庫	
番號	漢 8902
冊數	24 (1)
函號	287 14





雍正七年閏七月十六日和碩怡親王臣允祥一

等公武英殿大學士兼吏部尚書領侍衛內大臣

臣馬爾賽經筵日講起居注官太子太保保和殿

大學士仍管吏部戶部尚書翰林院掌院學士事

臣張廷玉經筵講官文華殿大學士仍管戶部尚

書事臣蔣廷錫謹

奏為恭請彙編

上諭刊刻頒發事竊惟牖民覺世天開首出之聖人錫

極綏猷人仰亶聰之元后唐虞三代之世帝典王

謨昭垂星日歷代英主賢君所有詔令具載史冊

若唐之貞觀政要明之洪武聖政等書當時編輯

頒布至今班班可考書曰聖謨洋洋嘉言孔彰洪
範曰皇極之敷言是彝是訓于帝其訓帝王誥誠
之文所以著勞來匡直之意示蕩平正直之途陶
淑斯民整齊治化經籍所傳復乎盛矣欽惟

皇上

道隆千古

治軼百王

闡精一之微言圖疇竝敘

建中和之大法彝紀丕昭爰弘垂訓立教之思用著
覺民正俗之義

綸言諄摯

詔諭周詳無一事不曲折指授無一人不親切提撕澄
敘官方整飭士習崇舉孝與廉之典申務農力本
之規杜抗糧健訟之風嚴竊盜爭鬪之禁以及倉
儲水利軍伍保甲諸大政皆洞悉情形引伸開導
天下臣民莫不警醒覺悟感發奮興聞風者洗心
滌慮自悔前非懷德者敬信奉行愈深鼓舞是
皇上之睿訓宏猷實萬世之金科玉律也歷年以來內
外臣工屢次恭請編次刊刻頒布天下未蒙

俞允今侍讀學士臣康五瑞又復條奏懇請臣等伏查
明洪武七年命宋濂等分類編輯所行善政著爲
寶訓五卷頒示天下後有善政史官隨類增入凡

十五卷又洪武十九年頒行御製大誥三卷使民
觀感知所勸懲且著訓曰朕出斯令乃臣民之至
寶頒布天下務必戶戶有之伏覩自雍正元年至
今七年

皇上訓諭數百萬言精微廣大無不備舉實與二典三
謨媲美後先允宜彙輯刊頒使遠近臣民家喻戶
曉昭萬年之法守立萬姓之章程伏祈

皇上俯允所請臣等開列大臣官員職名

欽點編次校閱等官自雍正元年以來所奉

上諭編年繕錄進呈

御覽恭候

裁定刊刻成書頒示天下俾海隅蒼生萬邦黎獻咸知
聖天子訓民勵俗之恩如此其懇勤誠篤將歸仁嚮義
一道同風仰承啓迪之

鴻謨永保邳隆之

盛治臣等不勝懇切顙望之至爲此謹

奏奉

旨內閣九卿翰詹科道會議具奏雍正七年八月初二
日太子太傅文華殿大學士兼吏部尚書臣朱軾
文淵閣大學士兼兵部尚書臣孫柱文淵閣大學
士兼禮部尚書臣陳元龍東閣大學士兼兵部尚
書臣尹泰內閣學士兼禮部侍郎臣德新臣對林

吏部左侍郎臣宗室普泰戶部右侍郎臣傅泰禮
部尚書臣石文焯左侍郎臣錢以塏右侍郎臣傅
德臣蔡世遠兵部尚書臣路振揚左侍郎臣楊汝
穀刑部尚書臣德明臣勵廷儀右侍郎臣海壽額
外侍郎臣牧可登工部左侍郎臣鄂爾奇都察院
左副都御史臣宗室塞爾赫臣謝王寵通政使司
通政使臣張懋誠左通政臣湯之旭左叅議臣雅
圖臣吳山臣張國棟大理寺少卿臣巴德保翰林
院侍讀學士臣覺羅逢泰臣德齡侍講學士臣覺
羅吳拜臣張照臣俞兆晟詹事府詹事臣張廷璐
吏科給事中臣高山戶科掌印給事中臣巴圖禮

科給事中臣兆華臣顧祖鎮兵科掌印給事中臣
馬賽刑科掌印給事中臣常柱工科掌印給事中
臣奚德慎掌河南道事監察御史臣梅琮協理河
南道事監察御史臣楊士鑑掌江南道事監察御
史臣傅色納協理江南道事監察御史臣劉吳龍
掌浙江道事監察御史臣羅鳳彩協理浙江道事
監察御史臣宗室崇揚赫掌山西道事監察御史
臣焦祈年協理山西道事監察御史臣歸宣光掌
山東道事監察御史臣善岱協理山東道事監察
御史臣湯倓掌陝西道事監察御史臣晏斯盛協
理陝西道事監察御史臣耿大烈謹

奏爲恭請編次

上諭刊刻頒布事臣等竊惟世運邇隆之會治平極盛之時必有繼天立極之聖人弘開覺民善俗之大化古稱峻德新民至誠成物惟文命光被於四表斯德教協和於萬邦堯典禹謨商盤周誥用以錫極歸極使之一道同風者由來尚已欽惟

皇上

德備中和

功兼位育

聰明睿知勤敷求康保之思

德禮政刑協仁育義正之用

乾行健而政紀咸肅

皇綱振而教化弘敷上則敬

天法

祖下則察吏安民凡理財用人之要務人心風俗之大坊

刑法令甲之科條閭閻衣食之經畫旱潦積儲之調發盜賊獄訟之防維農田水利之興修軍伍保甲之規制近自宮廷畿輔遠訖東西朔南無不仰

厪

宸衷上煩

睿訓黜陟刑賞必詳示底蘊以服其心因革變通必熟籌始末以期可久明天人感應之理示禍福自取

之由開人自新引人遷善

皇言藹藹

聖謨洋洋廣大精微高明博厚與天地合其德與日月

合其明殫

上聖之心思啓斯世之蒙昧至正大公渾然天理詳明
篤摯深入人心臣等伏念四海至廣兆民甚衆雖
其聽聞感悟不異面命耳提然必誦讀尋惟乃可
淪肌浹髓中外咸切近

光之慕臣民共殷就

日之忱伏乞

皇上聖恩俯允怡親王允祥等所請先就雍正元年至

七年所頒

上諭

特命大臣官員開館敬謹彙輯編年繕錄進呈

睿覽裁定刊刻成書頒行天下以後千萬年接續編刻

永以爲例俾萬方士庶奕世臣民仰見立政之

天心時聞敷言之

聖訓自庠序以至郊圻知無黨無偏之大義合知愚以
及老幼咸遵道遵路以同風斯正直蕩平治道超
於隆古敦龐熙皞民物育於太和臣等合詞公懇
俟

命下之日應派編次大臣及校閱繕錄收掌各官聽內

閣開列請

旨其擇吉開館一應事宜由禮部詳察典例具

題臣等不勝踴躍誠懇之至謹

奏請

旨奉

上諭年來內外大小臣工奏請刊布上諭者甚多朕皆未允今侍讀學士康五瑞又復具摺陳請怡親王大學生九卿翰詹科道等衆議僉同言詞懇切朕自御極以來時時以牖民覺世爲懷是以告誡臣工訓誨士庶化導兵弁者周詳往復不憚煩勞無非欲其慕義嚮風遷善改過共由於蕩平正直之途也凡此詔

諭所頒皆以

皇考之心爲心以

皇考之政爲政繼志述事率由舊章當時

聖諭之所啓迪包涵者朕則闡揚而詳發之其中間有因革損益先後不同者則因時制宜化裁變通之道也惟是歷年諭旨或因一省而發或因一事而發有司等照例宣示於該管之處其別省遠地豈能一一周知且傳寫悉經書吏之手字句之間往往錯訛遺漏夫欲使薄海之廣臣民之衆遵道遵路易俗移風必使天下之人備聞朕訓深知朕心庶幾感發奮興以爲進德修業之助今王大臣等旣稱上諭刊布有裨

益於人心吏治著照所請行朕亦不敢謂朕之諭旨
可以有勞來匡直之功惟冀億萬臣民共知朕提撕
儆戒之苦心耳

康熙六十一年十一月

詔一道

奉

天承運

皇帝詔曰惟我國家受

天綏祐

太祖

太宗肇造區夏

世祖章皇帝統一疆隅我

皇考大行皇帝臨御六十一年德茂功高文經武緯海宇

寧謐曆數悠長不謂謝棄臣民遽升

康熙六十一年十一月

一

龍馭親授神器屬於藐躬朕

皇考大行皇帝

德妃之子昔皇二子弱齡建立深爲

聖慈鍾愛寢處時依恩勤倍篤不幸中年神志昏憤病類風狂

皇考念

宗社重任付託爲艱不得已再行廢斥待至十有餘年沉疾如故痊可無期是以

皇考升遐之日

詔朕纘承大統朕之昆弟子姪甚多惟思一體相關敦睦罔替共享昇平之福永圖磐石之安孔子曰三年無

改於父之道我

皇考臨御以來良法美政萬世昭垂朕當永遵成憲不敢少有更張何止三年無改至於

皇考知人善任至明至當內外諸大臣朕方亟資翊贊以期終始保全務宜竭盡公忠恪守廉節俾朕得以加恩故舊克成孝思倘或不守官箴自干國紀旣負

皇考簡拔委任之恩又負朕篤愛大臣之誼部院屬吏直省有司亦宜實心任事潔已奉公不得推諉上官自曠厥職天下百姓受

皇考恩澤日久蠲賑頻施勸懲備至間有愚氓甘犯律令皇考每遇讞決必加詳審爰書累牘披閱靡遺少有可生

之路立施法外之仁凡我百姓各宜孝親敬長畏罪
懷刑以副朕仰法

皇考如天好生之意茲因諸王貝勒大臣文武官員人等
僉謂天位不可久虛

宗社允宜早主再三陳請朕勉徇輿情暫抑悲痛於是月
二十日祇告

天地

宗廟

社稷卽皇帝位以明年爲雍正元年仰惟
先志之宜承深望

皇圖之永固遙昭新化期衍舊恩於戲追慕

前徽繼述無忘於夙夜廣推

聖澤恩膏願被於寰區凡爾親賢文武其共矢蓋誠各輸
心膂用紹無疆之業永垂有道之庥布告天下咸使

聞知

上諭四十四道

十四日奉

上諭曰

皇考教養文武大小臣工六十餘年孰不躬沐

深恩今一旦

升遐衆心哀痛切至於將大殮時可命王貝勒貝子公文
武大臣俱入乾清門內令其瞻仰得盡哀戀之情

又禮部議奏儀注內開公主王妃俱於
乾清宮丹墀內齊集奉

上諭曰

皇考之女朕兄弟之福金豈可遠列丹墀朕心不忍著仍
入大內親近

梓宮使得盡哀朕之兄弟子姪俱著入乾清門內於丹陛

上隨朕行禮

又王大臣等奏請

上御昭仁殿或

御弘德殿奉

上諭今遭

皇考大事哀痛方深何忍安居內殿其以乾清宮東廡爲

倚廬

十五日

欽命王大臣四人爲總理事務王大臣奉

上諭現今啟奏諸事除朕藩邸事件外餘俱交送四大
臣凡有諭旨必經由四大臣傳出并令記檔則諸事
可以秩然不紊其奏事人處亦諭令記檔凡

皇考所有未完事件何者可緩何者應行速結朕未深悉
加以苦塊之次中心紛替著大臣等將應行速結事
件會同查奏請旨

又諸王大臣等合詞跪奏臣等仰見

皇上至性純孝過於哀慟伏思

大行皇帝付託至重

天地

宗廟

社稷所關甚大叩祈

皇上少節哀痛以保護

聖躬奉

上諭云

皇考之恩深重不但諸王大臣愛慕無窮凡官員兵民無不愛慕況朕受

皇考養育深恩盡孝盡哀乃朕爲子之道朕亦自量不至

過哀

又總理事務王大臣諸王大臣等以

上哀瘠過甚奉饘粥勸

進奉

上諭朕受

皇考付託之重朕自酌量可進飲食朕自少進若勉強飲食反於朕躬無益朕斷不肯少有假僞嗣後不必勸奏

又奉

上諭先時

皇考甚愛惜諸蒙古王台吉等一應大事其未出痘者皆

不令來京朕何敢違

皇考旨意而行著行文各蒙古處其未出痘者斷不可前來諸蒙古賓客皆感戴我

皇考撫養重恩今來朝謁

梓宮非常日可比著增給口糧

又奉

上諭蒙古賓客皆

皇考恩養之人來時視其品級高下排列整齊加意照看勿使勞苦

又奉

上諭曰

梓宮前太監因

皇考大事奔走服役值此嚴寒朕心深為憫惻著俱賞給皮衣

十六日禮部奏宣讀

大行皇帝遺詔儀注奉

旨著問該部此儀注內只議諸王大臣如何不議及朕躬禮部回奏

遺詔特曉諭內外頒行天下舊典未載

皇上應行之禮所以未敢具議奉

上諭

遺詔自宮中捧出時朕豈可照常靜處乎其作何行禮之

處總理事務王大臣禮部公同議奏覆奏

遺詔捧出時

皇上在

乾清宮簷下立

遺詔過時

皇上跪俟

詔過起

上回苦次奉

旨是

又總理事務王大臣議奏南海子舊衙門及鄭家莊新造

行宮此兩處

殿宇深嚴制度弘敞俱係

大行皇帝頻經駐蹕之地可以安奉

梓宮恭請

皇上欽定奉

上諭朕受

皇考深恩如天罔極忽升

仙馭攀戀無從惟有朝夕瞻近

梓宮稍盡哀慕之忱此二處隔越郊外離宮禁甚遠朕心

不忍爾等所議未當

世祖章皇帝大事時曾安奉於景山壽皇殿朕意亦欲安

奉於景山壽皇殿庶得朝夕赴

梓宮前親行奠獻爾等卽傳諭該部速行敬謹修理

又御史楊保等叅奏鴻臚寺官宣讀

大行皇帝遺詔時未宣漢文奉

上諭楊保等叅奏一案雖非大事然亦有關係朕今若將此事交部察議則以後滿漢人員必生互相異視之見

皇考一視同仁從未分別滿漢今朕念切紹庭諸事仰體皇考聖心且宣讀清字

詔書時大小臣工旣已共聞卽與宣讀漢字詔書無異此蓋

皇考在

天之靈使滿漢人員翕然如一家之意也有何分別滿漢之處著將本發還

又

諭總理事務王大臣先因京師米價騰貴

皇考宵旰焦勞

特命朕查視各倉彼時見倉糧甚多奏請將應行出倉之米迅速辦理蒙

旨俞允朕今仰體

皇考軫恤民生之至意務令米價漸平著交與監督張坦麟陳守創會同倉場卽速辦理其脩補舊廩添建新

厥甚屬緊要著交與監督張坦麟陳守創呂文櫻禪濟布折爾金帶領工部賢能司官確實料估會同倉場應脩補者速行脩補應添建者現今冬寒之際俟明年春初添建此項脩補添建所需錢糧動用捐貯驛站銀兩其應否補項之處再議此事並非此時應下之旨係遵奉

皇考原下之要旨是以特諭張坦麟等敬謹奉行

又奉

上諭曰

皇考念切天下兵民生計宵旰勤勞前因京師米價昂貴焦思極慮從塞外回鑿減膳節用自妃嬪以及宮人

太監日令一餐當

龍馭上賓之時猶惓惓未釋於懷也向來口外米穀不准運進口內而燒鍋仍照常開設可速令口外米穀准其進口其開設燒鍋著禁止從前朕恭承

皇考諭旨同大臣等查閱倉廩見各倉米穀甚多今應將倉內米穀作何發糶使米價得平以副

皇考聖心著隆科多孫渣齊查弼納明日進見面議

十七日禮部奏

登極儀注奉

上諭爾等所議自乾清宮月臺坐轎出乾清門正門等語乾清宮雖垂簾幙朕何忍在

皇考前卽坐轎出中門著將轎預備在乾清門朕從東旁門出再坐轎朕心始安 又禮部奏請御殿行禮旣畢列坐賜茶奉

上諭朕因祇承

皇考遺命勉抑哀痛成此大禮豈忍安坐飲茶卽在朝羣臣亦誰能下咽著停止賜茶 又禮部奏捧寶人員應捧

玉寶由

乾清宮御路中行奉

上諭此寶雖

皇考舊日所御今傳之於朕卽朕之寶也

梓宮在上豈可竟由中路而出著由甬路旁行

又大學士等奏頒雍正年號錢文式樣奉

上諭錢文係國家重務向因錢價昂貴常厘

皇考聖懷此事甚屬緊要從前雲南巡撫楊名時題請鼓鑄部議不准未經舉行今何以能使錢文價平方合皇考便民利用之意滇省之外何省應令鼓鑄與錢價有益之處著總理事務王大臣九卿公同會議具奏

又奉

上諭下五旗諸王屬下人內京官自學士侍郎以上外官自州牧縣令以上該王輒將其子弟挑爲包衣佐領下官及哈哈珠子執事人折挫使令者甚衆嗣後

著停止挑選其現在行走人內係伊父兄未任以前
挑選者令其照常行走若係伊父兄既任以後挑選
者俱著查明撤回或有過犯該王特欲挑選之人著
該王將情由奏明再行挑選

又奉

上諭張英勵杜訥在內廷行走歷年甚久端謹恪勤亦
曾教諸阿哥讀書朕篤念舊勞特加恩卹張英著加
贈宮保勵杜訥著加贈尚書該部議奏

又奉

上諭海青自幼隨侍

皇考實心効力年久人材亦好朕方供飯時忽然念及此

卽

皇考在

天之靈有以示之也著贈伊爲一品再太監顧問行亦係
自幼侍從

皇考効力年久之人著贈伊爲三品俱致祭一次

十八日

上以

大行皇帝遺詔內有二十七日釋服之

旨

諭滿漢大臣朕凡事無不遵奉

皇考遺旨而行但持服乃人子之道二十七日服制之處

朕斷然不從設若此事朕不得行其志必致懣恨無已爾諸王滿漢大臣宜體朕意

十九日禮部以本月二十日

皇上初登大寶詣

皇太后前行禮儀注遵

旨啟奏

皇太后奉

上諭

皇太后懿旨宣與諸大臣皇帝誕膺大位理應受賀至與我行禮有何關繫况

先帝喪服中卽衣朝服受皇帝行禮我心實爲不安著免

行禮欽此著總理事務王大臣禮部內務府總管等再

行恭懇

皇太后本日王大臣等具奏懇請奉

上諭諸臣所奏

皇太后覽過仍不受禮朕再三懇求奉

皇太后懿旨諸大臣等旣援引

先帝所行大禮懇切求請我亦無可如何知道了今晚於梓宮前謝

恩後再行還宮欽此傳諭王大臣等知之

又禮部奏本月二十日

皇上紹承大寶告祭行禮恭請停止

親詣

梓宮前奠酒併請

欽定恭代奠酒之人奉

上諭奠酒時朕仍親奠強自節哀朕得多近

皇考梓宮愈增福祉更復何所避忌明蚤上食時爾部大臣引朕至乾清宮門外朕親奠畢旁立俟徹祭後再行告祭禮

二十日

諭禮部朕惟自古賢聖之君必有顯號徽稱以昭功德之盛垂於萬世此國家不易之鉅典也仰惟我

皇考大行皇帝臨宇六十一年早承大統寅畏小心旦明

凜昭格之忱

郊祀親升中之典監於成憲率由舊章孝奉兩宮尊養兼至展敬

陵

廟備物盡誠總攬萬幾阜成兆姓蠲賦動盈千萬賑恤曾不稽時水旱先籌雨暘必達寬刑肆赦德洽好生盛暑則釋囹圄嚴寒則賑饘粥兵糧預給優賞頻頒淮甸屢巡動數百萬之帑金運

睿謨而兩河底績魯邦特幸行數千年之殊禮屈

帝尊而九拜崇師覽奏牘而利弊周知覲臣僚而賢愚立辨保全勲舊庇廕宗支廣育人材敦厚風俗布昭

聖武申討不庭元裔背叛而旋踵就殲三孽逆命而剋期
獻馘俄羅斯佔喀爾喀之疆圍諭以威德卽奉約章
喀爾喀逼厄魯特之暴殘納其困窮胥登衽席噶爾
丹肆毒鄰境三臨絕漠掃靖烽烟策妄阿喇布坦摧
滅與國出師命將恢復藏地臺灣置郡紅苗革心南
朔東西無思不服至於

天縱生知日新好學講筵時御手定六經廣博士於五賢
配先儒於十哲文媿二典書邁百家貫徹天文總括
地理旁羅術數考正元聲研索羣編鑒裁纂輯凡此
難名之美善洵亘古帝王首出之

一人雖復累牘連章不能紀述萬一朕方與天下臣民均

切怙戴不意

龍馭上賓顧予冲人嗣膺大統仰承

佑啟之恩敢後顯揚之禮謹考彝章宜升

尊諡爾部詳察典禮具奏

又

諭禮部朕惟君國之道必崇孝理化民之本務重尊親
欽惟我

母后仁承

天德順協坤儀恭儉溫慈懋昭淑範恩勤顧復誕育藐躬
朕纘荷鴻圖恭承

懿訓顯揚

聖善儀典宜隆式考舊章恭上

皇太后尊號爾部詳察典禮具奏

二十一日諸王大臣等以

萬幾至重咸候

聖謨治理請遵

大行皇帝遺詔二十七日釋服具奏奉

上諭云

皇考大行皇帝聖德神功罕有比倫實爲亘古未有之

聖君朕亦不宜行近代相沿之典禮釋服之制以日易月

雖始於漢文而高宗諒陰三年獨非古制乎朕不能

上比高宗而哀慕之情不能自己若謂三年有誤政

事則二十七日之內可保不誤乎況朕有賢好昆弟

親信大臣可以代朕總理庶務若謂二十七日之制

皇考既已行之於前須知

皇考御極之始正在冲齡朕非行前代未行之典禮以爲

超越前人然稽之史冊漢文以來誰能媲美

皇考爾諸王公大臣多平素讀書博通典故若從漢文以

來能舉一聖君如我

皇考者朕自當勉從衆請爾等若不能舉一媲美之聖君

則朕又安忍守漢文二十七日之制乎本朝舊制釋

服亦待百日之期庶可少盡思

君思

父之哀哀揣爾等之意惟恐過勞朕躬殊不知朕若持服
尚可少進饘粥暫眠苦塊如必強朕釋服則朕必致
寢食俱廢矣

皇考遺命一言一字朕無不拳拳服膺只此二十七日釋
服之

詔非敢故違而罔極恩深哀思迫切雖蹈違命之愆亦不
恤也朕言及此曷勝嗚咽實不能悉朕之悲懷爾諸
王大臣其諒之

又

諭內閣大學士圖海勲勞懋著從前

皇考御乾清宮曾降旨諭在廷諸臣其後亦屢經嘉獎茲

特追封圖海爲一等公其塋墓著交與該部修理並
加祭一次

又

諭內閣舅舅佟國維襲公奏摺蒙

皇考收貯機密事件之內敬思

皇考必另有主見始行收貯

孝懿皇后朕之養母則隆科多卽朕之親舅此公爵著隆
科多承襲交與該部修理舅舅墳塋加祭一次

二十二日

諭兵部現今各省將軍處題補引見到旗人員再各省
副叅以下千總以上題補引見到部人員著查明具

奏從前

皇考引見武職官員其甚不堪者頗少朕今值

皇考大事未得引見應派王大臣驗看將人材可用與例相符者具奏補授令其到任其人材庸劣者指名具奏如此則案件不至堆積而到京人員亦無守候之苦

二十三日諸王大臣等復以

郊

廟祀典必待

皇上除服後舉行大祀不可久闕考據古今典禮合詞虔懇再四固請遵奉

大行皇帝遺詔以二十七日釋服奉

上諭覽諸王大臣所奏引據經書義理明晰朕惟有嗚咽悲慟耳始知爲君之難祇此持服一節乃天子第一苦衷曾不如臣庶尙能各盡其心雖勉從所請朕之哀思因茲愈切矣

又

諭總理事務王大臣自大將軍以下各路將軍各省督撫提鎮及凡有奏摺之官員在京俱有管事之人若因

大行皇帝大事將本省奏來之摺隱匿不奏斷乎不可若沉擱或發回亦斷乎不可凡具奏者必因有事方奏

若有沉隱停滯日後發覺必照大不敬律治罪著嚴諭伊等在京子弟家人

又

諭總理事務王大臣從前我

皇考於吏部堂官除尚書張鵬翮外其餘大臣聲名不好者曾降

諭旨朕亦聞傅紳勒什布李旭昇等聲名不好今當嗣位之初恐伊等以朕未經辦事或奸巧舞文或因循怠忽日後察出朕必加等治罪張鵬翮亦不可推諉滿洲大臣以致貽誤事體被人連累將此傳諭張鵬翮知之

又奉

上諭曰

世祖皇祖考之乳母自幼看奉

皇考

皇考時常獎譽又

皇考之乳母自幼撫看朕躬朕追念之欲加恩典而兩家之子孫係何官職今在何處朕亦不知此兩家當如何加恩之處總理事務王大臣禮部滿漢大臣內務府總管恒親王裕親王公同議奏

二十四日總理事務王大臣內閣禮部翰林院奏大行皇帝尊諡廟號乃追崇大典

皇上至孝性成惟

聖知

聖伏乞

睿思親定昭垂萬世奉

上諭云

皇考大行皇帝尊諡廟號諸王大臣等請朕親定朕思子

臣尊崇

君父之心何有止極然必須至允至當方孚千秋定論若

少有溢美之詞不獨失天下之至公且開後人之僭

越是因臣子之愚忠愚孝轉將

君父盛德大業之實行涉於贊頌之虛文朕心殊不安也

我

皇考大行皇帝纘繼大統舊典本應稱宗但經云祖有功

而宗有德我

皇考鴻猷駿烈冠古轍今拓宇開疆極於無外且六十餘

年

手定太平德洋恩溥萬國來王論繼統則爲守成論勲業

實爲開創朕意宜崇

祖號方副

豐功但追崇大典攸關理應僉謀共協一人之心卽千萬

人之公心一時之論卽千萬世之公論爾諸王大臣

等可會同九卿詹事科道文六品以上武四品以上

詳考舊章從公確議毋得依違毋得附和務期紀實以垂萬年若稍有幾微未協知而不言則大非臣子忠愛之道

又

諭總理事務王大臣內外倉庫不無虧空看守人等知朕此時處處降旨申飭以爲朕凡事無有不知恐小人有思欲假借失火掩其虧空之事爾等嚴諭各該管大臣官員以至頭役人等知悉加謹小心倘倉庫有火燭之事該管官員以及看守兵丁執事人等俱照大盜律治罪

二十五日奉

上諭外間草炭價值騰貴其故皆因諸王阿哥及家貲豐裕大臣等令其家人出城遠迎邀截爭買居積待價冀獲重利其不肖家人復捏增原價巧飾虛詞從中隱瞞以圖肥己此等情弊係朕所洞悉者嗣後凡草炭運至局廠鬻賣者聽其買用外不得仍前出城遠迎各相爭買著交該部嚴行傳示倘仍蹈前轍令該管官兵卽行緝拏再草炭價值如何可使得平之處著該部定議施行

二十七日

諭總理事務王大臣軍前將軍各省督撫將軍提鎮等處所有

皇考硃批諭旨俱著敬謹封固進呈若抄寫存留隱匿焚
棄日後發覺斷不寬宥定行從重治罪京師滿漢大
臣官員凡一切事件有

皇考硃批諭旨亦俱著敬謹封固進呈目今若不查取日
後倘有不肖之徒指稱

皇考之旨捏造行事並無證據於

皇考聖治大有關係嗣後朕親批密旨亦著繳進不可抄
寫存留

又奉

上諭今值大事守護

梓宮之人有寒苦者朕視之不忍各賞銀三十兩整理衣

服使其溫煖此賞銀不必動正項錢糧從朕藩邸取
用

二十八日諸王貝勒貝子公文武大臣官員等恭
擬

大行皇帝尊諡曰

合天弘運文武睿哲恭儉寬裕孝敬誠信功德大成仁皇
帝廟號曰

聖祖奏入奉

上諭諸王大臣官員俱深悉我

皇考一生神聖實行同心合詞恭上

尊稱無一人異議甚愜朕懷朕之哀思庶可稍釋矣

又禮部請將元旦表文交與該衙門撰擬具奏奉

上諭曰

皇考大事尚未過百日元旦上表朕心不忍著九卿詹事科道會議具奏

又

諭內務府總管等諸王大臣僉云朕持服二十七日之後應居住乾清宮朕思乾清宮乃

皇考六十餘年所御之宮殿二十七日之後朕卽居住其中心實不忍朕意欲居於月華門外養心殿爾等可將殿內一應陳設敬謹收撤畧加脩葺務令素樸以備朕居朕不敢謂遵古三年諒陰之禮然必於養心

殿內守孝二十七月以盡朕心爾等可同該司料理

二十九日

諭內閣大學士尚書侍郎等朕惟敷政之道用人爲先闢門籲俊之典由來尚矣然知人則哲自古爲難朕在藩邸不與朝臣往來所以內外大小官吏皆不能晰知今荷

皇考大行皇帝命承大統臨御之初簡用人材最爲先務爾諸大臣皆久蒙

皇考知遇任以股肱况

梓宮靈爽式憑爾等哀感交迫之時益當各竭忠藎仰報高深內而大臣以及閒曹外而督撫以及州縣或品

行端方或操守清廉或才具敏練者爾等各據真知灼見從公具摺密奏古人云內舉不避親外舉不避讐爾等果矢公忠以人報國或素日同僚共事或同鄉同年或門生親戚子弟俱准保奏勿避嫌疑不可徇私援黨不可沽名市恩不可輕聽風聞不可言過其實有一於此則上負

皇考任用之恩又負朕諮詢之意自取朕之輕視矣

皇考遺命囑朕篤愛懿親保全臣下況數十年來

聖明之世本不容有姦貪昭著之人朕所需者人材但當有舉無劾毋得修怨陷害爾等具摺或滿字或漢字各須親寫不可假手子弟詞但達意不在文理字畫

之工拙其有不能書寫者卽行面奏至於政事中有應行應革能裨益國計民生者爾等果能深知利弊亦著各行密奏朕自卽位以來用人行政若有闕失爾等亦宜直言密奏毋得隱諱朕之諄切詢問者一則急欲得人以資治理二則欲知朕行事之當否三則觀爾等所舉之人及所奏之事便可知爾等之居心制行矣

三十日奉

上諭目今正值來往

陵寢道路之際恐不肖之徒肆行騷擾村莊生事訛詐有累地方官民亦未可定應派出滿漢御史各一員仔

細巡查如有此等之人卽行題叅工部尚書孫渣齊前去修理

陵寢往返亦著巡查再地方官修理道路各項預備之處俟文到預備亦不致悞不得預派徒勞黎民

康熙六十一年十二月

上諭三十四道

初一日以本月初三日恭移

大行皇帝梓宮奉安

壽皇殿告祭

上從苦次出望見陳設祭品遂失聲大慟

諭誠親王允祉等曰

皇考明年七旬大慶吾兄弟等方思以

萬壽聖節在

暢春園盡誠致敬供奉甘旨與四海臣民共效無疆之祝豈意今年此日乃於

乾清宮內作如此陳設耶言念及此心肝摧裂 又奉
上諭曰

先帝平日服御器用俱令陳設於

壽皇殿

又

諭宗室覺羅人員

皇考至仁至厚

恩篤宗支凡宗室覺羅大罪始行薄懲小罪槩予寬免歷
年

高天厚地之恩無一人及於刑辟者伊等自作罪孽必不
得已始令圈禁朕意曾經

皇考問罪圈禁之人原不可以釋放祇以現遇恩赦姑與
釋放伊等尚有何顏出門嗣後當自念身係宗室覺
羅可閉戶家居安分靜守倘仍不悛改到處往來又
經事發朕決不寬宥定行重治其罪

又奉

上諭每見八旗官員動輒罵及所屬人等父母薄俗如
此所不忍聞先經

皇考常申訓誡至再至三尚未悛改夫該屬人等卽有過
失只可指斥其本身於其父母何預且凡事自有國
法應答責者答責應題叅者題叅出言詬罵甚屬非
理嗣後仍有辱罵人之父母者許被罵之人卽行回

明該管大臣叅奏再宮內太監等亦好罵人父母嗣後如有太監在街道中罵人者許卽重打細綁交與步軍統領轉交總管太監懲治著步軍統領傳示各城內務府總管傳示各首領太監通行曉諭永遠禁止

初二日

諭戶部

皇考御極六十餘年澤周兆姓恩洽人心凡

巡幸所經州縣小民無不除道清塵趨事恐後古北口一路爲我

皇考每年行幸之地農工商賈皆得瞻仰

天顏親承膏澤今聞

皇考賔天民心不知如何悲痛此路百姓歷年出力實堪憐憫今將宛平順義懷柔密雲平谷五縣昌平一州雍正元年應徵正項錢糧一萬四千三百八十兩零盡行蠲免又

陵寢一路此時正當修道之際亦宜軫恤今將大興三河二縣通州薊州遵化州三州雍正元年應徵正項錢糧一萬三千三百七十六兩零亦盡行蠲免爾部行文該撫徧飭所蠲州縣實心奉行務令小民均霑德惠倘有不肖有司私行徵收澤不下究事覺定行重處爾部卽遵諭行

初三日奉安

大行皇帝梓宮於壽皇殿諸王大臣等合詞恭懇

皇上節哀奉

上諭我朝自

太祖

太宗

世祖以至

皇考咸貴實行不尚虛文朕遇

皇考大事五內哀痛不能自持諸王大臣以朕過於悲慟

公懇節哀朕思人子之於親喪哭泣擗踊亦庸常之

事將來能否仰副

皇考聖意保全骨肉惠養臣民如聖人所云善繼善述朕

亦未敢自必但朕受

皇考教誨鞠育迄今四十餘年恩勤篤摯慈愛無窮朕承

歡

膝下無時不瞻

天仰

聖一旦永別寸心如割觸目增悲至情迫切實不能已朕

非於此自謂盡孝亦非博盡孝之虛名也今朕躬尚

能勉強支持倘果不能亦不敢過於哀毀有負

皇考付託之重况

天降縞雪林木皆白自安奉

梓宮羣鴉環繞殿庭哀鳴七夜仰觀

天意俯察物情尚且如此朕能已於沉痛乎今

梓宮奉移壽皇殿朕未釋服之前必每日三次親詣獻食

一月內日一次親詣獻食一月後數日親詣一次如

此庶可稍釋悲思若欲朕銜哀強制則朕心愈無以

自解朕在藩邸從不務一切虛名今惟有行其所安

以自盡其心而已爾諸大臣其諒之不必再奏

初四日禮部奏恭上

皇太后尊號應行典禮儀注奉

上諭欽奉

皇太后懿旨予自幼入宮蒙

大行皇帝深恩備位妃列幾五十年雖夙夜小心勤修內

職未能圖報萬一

欽命予子纘承大統實非夢想所期

龍馭升遐予卽欲相從冥漠予子皇帝再三諫阻以爲老

身若逝伊亦欲以身從雪涕含哀情辭懇至予念

先帝付託之重丕基是紹

宗社攸關勉慰其心未伸予志今諸王大臣援引舊典請

上尊稱此時

梓宮大事正在舉行凄切哀衷何暇他及尊崇典禮實非

予心所安况予戒慎居心謙冲訓子但願予子體

先帝之心永保令名諸王大臣體

先帝之心各抒忠悃則兆民胥賴海宇蒙休予躬大有光榮勝於受尊稱遠矣予言字字出於真誠可傳諭諸王大臣共諒予心勿復固請欽此傳諭總理事務王大臣等知之 本日諸王大臣等具摺懇請

皇太后堅執不允

皇上誠敬諄切叩請再三始奉

慈諭隨降

諭旨曰諸王大臣奏請一疏朕親呈

皇太后再三懇請奉

皇太后懿旨諸王大臣援引舊典懇切陳辭皇帝屢次叩請予亦無可如何知道了欽此

初五日禮部等衙門將三大節慶賀表式進

呈奏請頒發各省奉

上諭九卿奏請撰擬元旦萬壽冬至表式頒發現今

皇考大事未過百日正哀慕之時朕豈忍升殿受賀元旦冬至賀表應俟雍正二年舉行至萬壽表文非過二七月斷不可頒發諸王大臣卽強行再奏朕亦必不允從

初六日

諭內閣九卿翰林詹事科道朕仰荷

祖宗眷佑續承大統恭上

皇考聖祖仁皇帝

尊諡敬念

太祖高皇帝

太宗文皇帝

世祖章皇帝

三聖相承功高德盛載考典章加上

尊諡因念

孝莊文皇后翊運啟基育成

兩帝朕在冲齡備膺慈愛

孝康章皇后誕育

先皇懿徽流慶

孝惠章皇后德隆福厚篤愛朕躬朕意亦宜並加

尊諡但追尊固出至情而推崇必遵定禮爾等可稽考載

籍酌古準今會同確議具奏俾朕得稍展思慕之誠

又念

仁孝皇后作配

皇考孝敬寬仁坤儀懋著

孝昭皇后恪恭溫順樹範宮闈

孝懿皇后徽音淑德慈撫朕躬恩勤備至均應恭上

尊諡以昭示萬年爾等一併會同詳察典禮擬奏

又

諭總理事務王大臣奉

皇太后懿旨

孝懿皇后曾撫育皇帝貴妃係

孝懿皇后親妹我意欲將貴妃封為皇貴妃又和妃奉事先帝最為謹慎將和妃封為貴妃將此與皇帝商議朕惟皇太后聖心至仁至厚此

旨實為允當貴妃封為

皇考皇貴妃和妃封為

皇考貴妃爾等會同禮部查例具奏

又

諭滿漢部院八旗大臣等諸侍衛近侍及執事人以受皇考數十年參養深恩不忍遠離

梓宮奏請願往

陵寢守護者甚眾若盡行遣去勢有不能朕念

皇考陵寢如照定例止令總管關防等守護朕心實為不忍朕意欲於諸弟中派出一人封以王爵子姪內派出二人封以公爵永遠恭代朕躬守護

陵寢此處另降諭旨外應將大學士一員尚書二員侍郎二員都統二員領侍衛內大臣一員內務府總管一員副都統二員散秩大臣二員乾清門侍衛四員近侍四員侍衛藍翎四十員派出守護伊等缺出不必補人此所派官員將現任滿漢大臣及原品食俸原品致仕並從前委署人員職名查明開列具奏

初七日

諭總理事務王大臣爾等傳諭直隸各省將軍督撫提鎮伊等貢獻方物除將食品恭獻至

梓宮前者外其進至朕前者惟藥物可以照常呈進餘者二十七箇月內俱不得呈進有呈進者朕亦不閱奏事人等不敢接傳並不記檔二十七箇月後有欲貢獻方物者先行奏請得旨後方許奏呈

又

諭吏部兵部王大臣等驗看應行革退人員內其曾在軍旅効力身經受傷竟以衰邁革退甚可憫恤著留與伊等職銜再文職官員內除捐納出身而年老庸劣者外其由進士舉人正途出身人員自幼讀書初

選知縣卽以才力不及革退亦爲可憫嗣後將此等人員酌量或授爲教職或著原品休致之處吏部會同兵部定議具奏

初八日奉

上諭外藩小台吉到日應給與廩餼不必久留卽令起程各回本處隨到隨令瞻仰

梓宮至於除服之後朕隔一二日至

壽皇殿乘便著蒙古王貝勒貝子公併大台吉十餘人齊集見朕其各小台吉亦令於景山東門內遠處齊集

初十日

諭總理事務王大臣各部院出稅差官員往年皆公帑

無虧而羨餘又足養贍家口照看親戚族人近日則不然率多虧帑獲罪歸亦無顏見其宗族親戚公私均屬無益

皇考洞鑒其故每將稅務交與地方官管理各省已居其半嗣後稅務悉交地方官監收歲額之外所有羨餘該撫奏聞起解應賞給者再行賞給爾等會同戶部工部議奏

又禮部議覆朝鮮國王送到山東漁採人楊三等被風飄至伊國審無信票又據奉天將軍咨報楊三等至鳳凰城始將信票交出復被領催雅爾泰失去應將楊三等交山東巡撫確查曾否給票雅

爾泰照例治罪奉

上諭朝鮮誠心篤敬臣服我朝歷年已久今將山東漁採船隻飄風到伊國之楊三等十四人送回伊等或實係風飄到彼或匪類借端欲爲不法俱未可定嗣後飄風船隻人口有票文並未生事者照舊令其送回若無票文生事犯法者著朝鮮國卽照伊國法懲治此係遵奉朕旨並非伊敢將內地之人私行治罪也如此匪類方知畏懼越境妄行之人便少著九卿詹事科道公同會議具奏

十一日奉

上諭比見八旗官員兵丁內嗜飲沉湎以致面貌改常

輕生破產肆行妄爲者甚衆其中豈乏材具可用之人朕實憫之惜之著八旗都統各將該屬官兵內酗酒不肖之徒給限一年或二年令其悔改能改者留之如不能改係官員卽行題參應襲者令人承襲係兵丁卽行革退將本佐領下閑散人內揀選人材可用者充補食糧旣可以養其生亦可以得其力如此凡嗜飲酗酒之徒自知所懲戒矣若禁止之後仍然不改一經查出并將該管官員嚴行治罪再著行文外省將軍副都統城守尉等一體嚴加約束務令法在必行

十二日奉

上諭年老大臣俱係

皇考所用舊人每由午門外步行入內奏事甚屬勞苦可憫因此前曾降旨與王大臣等王大臣等以俱令騎馬入內未免繁擾等語具奏從前

皇考理事之日諸大臣俱預先齊集略行歇息然後入內奏事現今伊等旣有陳奏事件又請

皇太后安請朕躬安不時入內著將六十五歲以上大臣應騎馬入內者列名具奏其准騎馬入內大臣由東華門入者至箭亭前下馬由西華門入者至內務府總管衙門前下馬

又

諭九卿等自

皇考升遐以來朕心哀慕無已一應典禮俱令詳考舊章務從隆備蓋不敢以天下儉於

親也但上之所行下必效之向來八旗官員於喪葬等事已極糜費今見朕備禮如是恐習以成風競尚奢侈而兵民等或至傾家蕩產殊與朕以禮教天下之意不相副也論語云禮與其奢也寧儉喪與其易也寧戚禮記云喪具稱家之有無載在典籍甚昭著也著九卿等將滿漢職官按其品級分爲等次及兵民喪葬務從簡樸毋得僭妄併將婚嫁等禮詳議定例具奏

又

諭刑部恩詔內赦罪一款非朕本心徒開惡人徼倖之門於事有何裨益但朕卽位之初諸臣援例陳請不得不允奏施行凡此罪人皆因其自取之罪並非治之以不應得之罪也此番援赦豁免人等俱宜詳記檔案如旣赦之後仍不悛改干犯法紀務將伊等前罪加等罪之著詳悉曉諭

又

諭內閣九卿等陳夢雷原係從耿逆之人

皇考寬仁免戮發往關東

皇考東巡

念其平日稍知學問帶回京師交誠親王處行走累年以來不思改過招搖無忌不法甚多朕以

皇考恩免之人不忍加誅然京師斷不可留

皇考遺命以敦睦爲囑陳夢雷若在誠親王處將來必致有累九卿等知陳夢雷者頗多或其罪有可原不妨直言朕卽赦免如朕言允當應將陳夢雷并伊子遠發邊外或有陳夢雷之門生平日在外生事者亦卽指名陳奏又楊文言乃耿逆僞相一時漏網公然潛匿京師著書立說今雖已服寘刑如有子弟在京者亦卽奏明驅遣爾等毋得徇私隱蔽陳夢雷處所存古今圖書集成一書皆

皇考指示訓誨

欽定條例費數十年

聖心故能貫穿今古彙合經史天文地理皆有圖記下至山川草木百工製造海西秘法靡不備具洵爲典籍之大觀此書工猶未竣著九卿公舉一二學問淵通之人令其編輯竣事原稿內有訛錯未當者卽加潤色增刪仰副

皇考稽古博覽至意

又理藩院遵

旨將曾經軍前効力荷蒙

聖祖仁皇帝恩眷之蒙古王台吉等分別次序在

梓宮前以

聖祖仁皇帝御用物件賞賜奉

上諭凡此皆

皇考御用之物爾等乃

皇考信任之人故頒賜爾等嗣後當永永思念

皇考恩遇之隆倍加効力

十三日

諭部院各衙門凡出示曉諭原欲利民除弊使人知所
遵奉以昭功令也書云欽乃攸司慎乃出令令出惟
行弗惟反以公滅私民其允懷可見條教號令所係
綦重古聖王兢兢慎之近見各衙門出示或變易舊

章或恣徇私意或作威作福或釣譽沽名往往朝夕
自爲更改彼此互相矛盾胥吏因之以作奸宵小借
端以滋擾種種弊竇不可勝舉

先帝嘗深惡之嗣後各衙門遇當禁約曉諭之事務期矢
公矢慎協情當理可以永遠奉行者方准出示倘仍
蹈舊轍科道官卽行叅奏治罪

又

諭戶部自古惟正之供所以儲軍國之需當治平無事
之日必使倉庫充足斯可有備無患

皇考躬行節儉裕國愛民六十餘年以來蠲租賜復殆無
虛日休養生息之恩至矣而近日道府州縣虧空錢

糧者正復不少揆厥所由或係上司勒索或係自己
侵漁豈皆因公那用

皇考好生如天不忍卽正典刑故伊等每恃寬容毫無畏
懼恣意虧空動輒盈千累萬督撫明知其弊曲相容
隱及至萬難掩飾之時又往往改侵欺爲那移勒限
追補視爲故事而全完者絕少遷延數載但存追比
虛名究竟全無著落新任之人上司逼受前任交盤
彼旣畏大吏之勢雖有虧空不得不受又因以啟效
尤之心遂借此挾制上司不得不爲之隱諱任意侵
蝕展轉相因虧空愈甚庫藏全虛一旦地方或有急
需不能支應關係匪淺朕深悉此弊本應卽行徹底

清查重加懲治但念已成積習姑從寬典除陝西省
外限以三年各省督撫將所屬錢糧嚴行稽查凡有
虧空無論已經叅出及未經叅出者三年之內務期
如數補足毋得苛派民間毋得借端遮飾如限滿不
完定行從重治罪三年補完之後若再有虧空者決
不寬貸其虧空之項除被上司勒索及因公那移者
分別處分外其實在侵欺入己者確審具奏卽行正
法倘仍徇私容隱或經朕訪聞得實或被科道糾叅
將督撫一併從重治罪卽如山東藩庫虧空至數十
萬雖以俸工補足爲名實不能不取之民間額外加
派山東如此他省可知以小民之膏血爲官府之補

直地方安得不重困乎既虧國帑復累民生大負
皇考愛養元元之至意此朕所斷斷不能姑容者前日恩
詔中內閣引例開列有豁免虧空一條朕未曾允行
誠恐開貪吏傲倖之端而於民間究無裨益也至於
署印之官更爲緊要必須慎重簡擇諺云署印如行
刦

皇考每言及此未嘗不痛恨之蓋署印之人始而百計鑽
營既而視如傳舍故意貪婪圖飽慾壑或取媚上
官供其索取貽害小民尤非淺鮮其於前任虧空視
作泛常接受交盤復轉授新任苟且因循虧空之弊
終不得清嗣後如察出此等情弊必將委署之上司

與署印之員一併嚴加治罪決不寬貸爾部可卽傳
諭各省督撫

十五日

諭怡親王允祥等朕受

皇考深恩四十餘年未嘗遠離自

皇考升遐無由再瞻

色笑今追想

音容宛然在目御史莽鵠立精於寫像昔日隨班奏事常
覲

聖顏

皇考有

御容數軸收藏內府今

皇考高年

聖顏微異於往時著莽鵠立盡心圖寫

御容爾等擇潔淨肅清之地令莽鵠立薰沐敬寫

又

諭總理事務王大臣

皇考於文武官員見一二次卽知其居心行事歷久不忘故將一應官員俱調來引見朕不能如此若俱調來引見伊等往返甚苦且此際又致懸缺署理嗣後文武官員內將何等官員以上調來引見何等官員先補授後引見之處爾等與吏部兵部會同詳加定議

具奏

又

諭總理事務王大臣從前揀選庶吉士外諸進士俱留京學習三年伊等若果用心學習猶可如不用心學習則留京何益嗣後進士內揀選學問好者著令教習年滿照例補用其餘進士等俱令回籍伊等候缺之處爾等會同翰林院吏部議奏

十七日奉

上諭內廷各執事人員俱係隨侍

皇考之人其中亦有大臣官員子弟著各該處總管揀選保奏引見朕酌量錄用有通曉滿漢文者著聲明

又工部查奏臺灣各屬軍器損缺應令賠補奉
上諭去年賊犯朱一貴等作亂官兵俱各効力此項著
落賠補軍器之處俱免其賠補

又戶部奏康熙六十一年河南通省漕糧仍令運
送奉

上諭今年應徵本色米石照常運送其採買米石俱著
折銀解部免其起運次年將本色採買之米石著全
運送

十八日刑部將四季奏

聞已結未結事件黃冊進呈奉

上諭各省已結未結事件部內四季繕造黃冊具奏

皇考至聖一經

御覽歷久不忘諸事故能速結朕實不能企及凡定限事
件限內能完與否朕亦不能深知恐定限太緊或有
不能如期之處總理事務王大臣會議具奏

二十日河道總督陳鵬年奏秦家廠等堤工河水
漫溢奉

上諭此漫溢之處不於歲前堵築完竣來年桃汛水發
愈難辦理陳鵬年會同楊宗義務於歲前速行堵築
完竣該部知道

二十一日

諭總理事務王大臣外藩蒙古諸王貝勒貝子公台吉

塔布囊於

太祖

太宗

世祖時誠心効順各著勤勞是以

恩寵優渥世襲罔替復蒙

皇考加恩撫恤六十餘年今因朕御極來朝應召入見賜

茶其如何陛見之處著議奏

又禮部奏請慶賀元旦禮儀奉

上諭禮部奏請元旦詣

皇太后宮行禮并請朕升殿受禮朕轉奏


皇太后奉

皇太后慈諭皇帝登極鉅典攸關是以前日勉從諸王大

臣之請今雍正元年元旦尚在百日之內何忍卽行慶

禮欽此諭爾等知悉至朕元旦升殿前請頒發表式之

本已降諭旨



<p>早</p>	<p>...</p>	<p>...</p>	<p>...</p>	<p>...</p>	<p>...</p>	<p>...</p>	<p>...</p>	<p>...</p>	<p>...</p>
----------	------------	------------	------------	------------	------------	------------	------------	------------	------------

